

geschaffet/wie denn dasjenige auch/welches sie für den Husten vnd Flüsse den Schafen/ auf gutem Mithridat in gebrannten Wein bereitet/ eingegeben haben.

Man hat nicht weniger Mittel für die unvernünftigen Thier/denn für die Menschen/ wi der die Pestilenz. Gläubt auch gänzlich/daz die Schafe eben so wol/als die Säwe/vmb des hess lichen gestanks des Schafsmists willen/der Pestilenz gar geschr seyn. Damit man aber solchem siechtage für kommen möge/ so ist für gut geachtet worden/daz man die Schäfferchen/ oder den Schafstall mit oberzahlten wolriechenden Kräutern/ Als Poleyn/ wilden Balsam/Rauten vnd Wecholdern zum offternmal beräuchern lasse/auch unter jre Speiß vñ Futer den gemeinen Klee/ an statt des rechtens/ welcher in dem Gebirg wächst/Cytalus, genannt/ menge/ vnd viel zu essen gebe. Wogemut vnd wilder Balsam/ist nicht allein für diese Krankheit/sondern für den Schafshusten trefflich gut.

So sie von wegen erweichung des Horns/ dieweil sie vielleicht eine lange zeit/in ihrem eigen Mist gestanden/ hincken/ oder nicht wol gehen mögen/ so sollt du jhnen das Horn an der spizen/ da es am meisten verdirbt/ abschneiden/ vnd vngelöschten Kalck darüber schlagen/ mit einem Lumen einen Tag lang verbinden: Darnach den andern Tag Spangrün darüber schlagen/ und jnner dar vmbwechseln/ so lange bis das Horn widerumb stark vnd hart ist worden. Wenn ein Schaf das Blutsaugende Thierlin verschluckt hette/ so solle man ihm viel Essig warm einschütten/ oder Helleinaissen.

So sie aufwendig am Leib Geschwär haben/ so solle man jnen dieselbigen öffnen/ vnd rein Salz mit weichem Pech auff die Wunden schlagen.

Wenn ein Schaf mit jungen geht/ vnd ein schwarze Zungen hat/ so ist es ein anzeigen/ daz es schwarze Lämlin werffen wird: Ist jm die Zunge weiß/ so trägt gewißlich ein weisses Lämlin. Wo sie aber mit mancherley farben geserbet ist/ so wirfft es gesprenglete Lämlin.

Die Wölfe mögen den Schaffen keinen schaden thun/ so man dem ersten/ welcher voran sol gehen/ Wilden Knoblauch an den Hals hencke.

Den jungen Lämlin/ sol man auch räthen vnd helfen lassen/wen sie entwiders das Feber/ oder sonst andere Krankheiten bekommen: Auch wenn sie frack seind/von jren Müttern absondern/vnd jnen/wenn sie das Feber haben/ ihrer Mutter Milch zu trincken geben/ mit so viel Regenwasser vermengt.



Die Schafe werden zum offternmal am Knie räudig vnd schäbicht/ wenn sie das Gras essen/darauf der Laube noch liegt. Für solche Krankheit sol man Jesop/gestossen Salz/eines so viel als des andern nemen/vnd jnen das Maul/die Zunge/vnd den Kifel damit reiben: Darnach mit Weinessig rein abwaschen/vnd den Brästen mit weichem Pech vnd Schweinen schmalk mit einander vermische/schmieren.

Man hütte sich Hammelsfuss zu essen/so man das Würmlin/ welches sie zwischen dem spale unten am Horn tragen/vorhin nicht hinweg gethan hat. Deū so man solches jetzt gemeltes Würmlin verschluckt vnd jst/ macht es den Personen einen unwillen/ würgen vnd groß Magenwehe.

Allhie wil ich auch die Bawersfrauen lehren/ wie nützlich sie der Schafe mag allerley Krankheiten damit zu heilen/ gebrauchen.

Der jungen Lämlin Lippe getruncken/ist gut wider allerley Gifte.

Schafsgehenc oder die Lungen/auff das Häupt frisch vnd warm auffgelege/ist ein besondere Arzney/für das Laube Hauptwehe/ Phrenesis genannt/ oder für den grossen schmerzen des Häupts/darfür man nicht schlaffen kan.

Trückene Schafslung zu puluer gestossen vnd auffgelegt/heilet den Brästen unten auff den Berßen.

Schafsfell frisch ausgezogen/vnd also warm auff die zerschlagene/zerstossene vñ zerknitschte Glieder/oder auff die/ so mit Ruten hart gestrichen seyn/gelegt/ ist die aller kostlichste Arzney/ welche als bald hilffet: Das Schaf muß aber von keinem Wolff aebissen seyn worden.

Die Schafswollen stillt den schmerzen/ vñ legt die geschwulst der Glieder/da sie über gelegt wird/allein sie muß von keinem Wolff berührt/oder gebissen seyn worden/ den solche Wolln mehr desto mehr den schmerzen/denn daz sie jn stillen solt.